

北

學

編

北學編卷之三

大清

孫徵君先生

先生名奇逢字啟泰號鍾元晚年僑居河南輝縣講學蘇門學者所稱夏峰先生也本籍直隸容城人舉萬歷庚子順天鄉試屢徵不仕北地僉號徵君少與定興鹿忠節爲友以聖學相砥礪見義必爲敦品行篤倫理弱冠連喪父母率兄弟廬墓側凡六年學使者以純孝聞旌其門天啟乙丙間逆閹魏忠賢竊柄

毒虐正人大興鈎黨獄桐城左公光斗嘉善魏公大中
被逮是時高陽孫公承宗以樞輔督師榆關忠節
參贊軍事其父鹿太公正暨新城張果中與先生同
志爭出身營救而先生密上書孫公公得書以軍事
疏請入覲忠賢大恐謂將清君側遶御牀而泣以嚴
旨遏於途遂坐左魏以賊各累萬榜追之先生與鹿
正張果中謀贖金輸納炎蒸跨一驢奔走數百里各
得金數百齎送都門而兩公已先斃於杖矣越一年
吳縣周公順昌復被逮坐以賊先生復力爲營救而
周又已杖斃矣當是時逆燄方張諸公素所交游搖

手噤不敢發聲獨先生傾身爲之而諸公卒賴以歸
骨世所稱范陽三烈士蓋謂先生與鹿正張果中也
孫公高先生之義欲疏請以職方起贊軍事使其友
茅容儀先之不應歲丙子兵薄容城有司紳士分城
而守先生率族黨領西北隅雉堞久圯兵突至隨禦
隨築鄰邑多陷容城巋然獨存巡撫張其平上其事
詔優秩擢用會南都大司馬范公景文亦以軍務馳
聘先生俱不應其後烽烟四警城堡殘破乃攜家人
易州五公山門生親故從而相保者數百家先生爲
教條部署守禦而弦歌不輟入

國朝以國子祭酒徵有司致趣卒固辭迺遷於輝慕
蘇門百泉之勝遂家焉率子孫躬耕自給弟子日進
是時先生年六十有四矣先生講學以倫常爲本以
慎獨爲宗隨時隨處體認天理治身務自刻砥而與
人絕去町畦有來學者無賢愚必開以性之所近使
自力於庸行故人皆服其誠聆其議論無不信聖賢
之可爲其成人之美完人之節力持風化蓋終身以
之所著有四書近指讀易大旨尙書近指理學宗傳
家禮酌歲寒居答問孝友堂家規識輔人物考中州
人物考取節錄諸書行於世卒年九十有二河南北

學者歲時奉祀百泉書院而容城故壤與劉文靖因
揚忠愍繼盛同祀北地從遊之士自先生南遷淵源
可證如獻縣王餘佑定興耿極涿州陳鉉容城張于
度清苑高薦馨新安崔玉階王之徽雄縣馬構思等
竝敦品力學鼓舞後進而魏蓮陸與先生子立雅博
雅尤共相砥礪身任其傳

尹會一曰吾鄉尚氣節而蹈道爲難先生周旋左
魏諸公之難豈似慷慨之爲而卒遠於禍觀其在
白溝邂逅浮邱語問問心氣和平雖縱騎環伺莫
能乘其隙蓋心泰而誠至物自無忤焉然則先生

之養可知矣

杜徵君先生

先生名越號紫峯定興人篤學力行受業於鹿忠節之門康熙十七年舉鴻博不就巡撫使者以車過其門掖之登而行及至京師先生堅以老辭有

詔昇入伏而不謁乃免試命之出卽日趣駕歸里奉

旨特授中書舍人不拜時年八十有三

尹會一曰先生傳志不得而見之矣於恕谷後集見先生軼事世稱杜徵君有以夫嘗讀綱目至東漢徵處士周黨嚴光王良至京師特書黨光不屈

所以嘉節守而美光武之培土風也觀於斯而見
千古之治有同道矣

王五公先生

先生姓王名餘佑字介祺保定之新城人隱五公山
北地學者至今稱五公山人初先生父延善縣諸生
尚義當明之末散萬金產結客三子長餘恪季餘嚴
先生其仲也繼世父建善令魯山會闖賊陷京師先
生自魯山歸父帥三子與雄縣馬魯建義旗傳檄起
兵討賊容城孫徵君奇逢亦起兵共恢復雄新容三
縣斬其僞官未幾賊敗清師入先生父爲仇家陷
執入京三子將行餘恪以先生後世父不可死揮餘
嚴爲復仇計遂獨身赴難父子畢命燕市餘嚴歸帥

壯士入仇家殲老幼三十口無子遺於是急捕先生兄弟會上官力爲解迺免先生於是奉魯山公隱於易州之五公山此五公山人所由稱也先生少有大志嘗受業於孫徵君學兵法國變後更與徵君往來講學究經史授生徒教以忠孝務實學兼文武才薦紳先生選選構講堂具安車幣迎受業遠近從遊至數百人既隱五公學無不究嘗彙古人經世事爲居諸編數卷此書十卷萬勝車圖說一卷兵民經絡圖一卷諸葛八陣圖一卷皆霸王大略又湧幢草三十卷文集三十二卷自少壯數十年感慨激烈之致一

發於詩爲文數千言立就每談兵述往事論忠孝大
節目炯炯如電聲若洪鐘顧平居與人和易從容簡
諒以講學著書爲事隱居教授不求聞達終其身年
七十卒學者私謚文節先生

尹會一曰吾觀王或庵撰五公山人傳謂先生負
經世才其詳得自吾邑李剛主讀其遺書至撫卷
太息曰此諸葛武鄉之流嗟乎吾嘗怪世之人動
以儒術迂疎爲道學詎病如先生者隱而未見耳
使獲見用於世其不一雪斯言也與望溪先生嘗
與余商訂北學亦爲先生屈一指余故采或庵所

載書其略以志嚮往云

刁蒙吉先生

先生名基命以避廟諱易曰包字蒙吉別號用六居士祁州人父諱克俊有道而樂施與學者所稱貞惠先生也先生生而魁岸又性穎異年二十有五登天啟丁卯賢書既再詣春官不遇遂絕舉子業以斯文爲己任於城隈闢地爲齋曰潛室亭曰肥遯讀書其中無間寒暑學者宗焉執經之履常滿戶外甲申閩變設思廟主於所居之順積樓朝夕哭臨賊命敦趣以死拒幾及於難會賊敗得解入

國朝遂不仕日取四子五經及宋元以來諸儒書反

復尋玩積二十餘年所著有易酌十二卷四書翼註
十六卷斯文正統十二卷辨道錄八卷潛室劄記二
卷用六集十二卷其學以謹於言行爲要嘗曰君子
守身之道三一日言語不苟一日取與不苟一日出
處不苟又曰吾日三省吾身心無乃有妄念言無乃
有妄發事無乃有妄爲乎於梁溪高忠憲公尤篤好
之曰乃所願則學高子也置主奉之如貞惠禮一言
弗檢一行弗實必晨詣悔謝曰某不肖甚媿吾父吾
師不可爲子不可爲人其勇於自克如此年六十有
六以居母憂毀悴遂不起門人私謚爲文孝先生先

是貞惠卒三日勺水不入口母哭慰之始勉進一盞
米鬚髮盡白杖而後起令門人治喪一倣文公家禮
既葬廬於中庭檐下三年不飲酒不食肉不入內室
每朔望忌辰悲號感路人居恒木訥似不能言及事
至當言則正色而談上下傾聽故州有大事不能決
者亦必待其一言爲斷流賊圍州城毀家糾眾誓固
守城得不破兵退後流民載道設屋於西關聚養之
疾病受傷者給以醫藥全活甚眾有山左難婦七十
餘人不能歸命老成家人往送之臨行八拜以重託
家人皆感泣竭力護送無一婦不得所者又篤於故

舊終始如一慎於交遊然諾不苟與魏蔚州及東林諸君子爲神交各以所得遙相質正問學至老不倦先生歿後無錫人士遂於道南祠崇祀焉

尹會一曰先生承貞憲潛德所學由高顧而上溯程朱蓋醇乎其醇者也幽光之發厥後必大孫三人才名並著與余共學多年忽焉歿矣思其人愈思其人之論謀所自不禁慨然增悲嗟然高望也

魏果敏先生

先生名象樞字環極宣化蔚州人順治丙戌進士選庶吉士授給事中疏凡數十上風節大著以吏科掌大計陟廉黜貪計典肅清尋以事左遷遂乞養母里居十年務修身教家以化其鄉人丁母憂喪葬準古禮康熙初以大學士馮溥薦起貴州道御史累遷左都御史掌院事振肅憲綱中外嚴憚凡所陳奏俱關大體不爲一切近功小利姑且補苴之論進刑部尙書疏引漢臣汲黯自請爲中郎補過拾遺故事請辭司寇而留總憲奉

旨加刑部尚書銜仍畱原任於是感荷

聖祖恩遇益勵蓋忱知無不言嘗因地震指斥權貴
尤人所不敢言後爲刑部尚書治獄嚴明未嘗輕有
縱釋而被罪者亦往往稽首感服無異詞奉

命巡察畿輔未幾以疾乞休年七十一卒於家

上聞悼惜敕所司給祭葬如禮謚曰果敏雍正十
一年入祀賢良祠先生在臺省孜孜以汲引人才爲己
任每聞一佳士賢員輒於衆中樂道不置雖數千百
里必寄書或贈詩以通殷勤所舉睢州湯潛庵定州
郝冰滌平湖陸稼書皆名臣鉅儒居恒究心理學常

曰知一句行一句知一字行一字方是眞實學問所
著有儒宗錄知言錄并寒松堂文集行世

尹會一曰大臣之義首在薦賢余讀先生薦十賢
疏如見斷斷休休之氣象蔡聞之謂其可方羊叔
子讓開府表信哉世徒仰其峻厲以爲風節異人
而不知先生好善之量宏遠矣

陳半千先生

先生名湧字半千安州人性倜儻負不羈才少好淨
屠說旣而覺其誤聞容城孫徵君講學蘇門千里從
遊徵君深引重之明末有賊自山東掠婦女百餘人
入州境流離相屬於道先生悉收養於州城朝陽觀
中給以飲食問其里居姓氏遣人送歸又遍收途次
棄兒令家人飼養之全活甚衆避地完縣趙受繩稔
其貧以金餽之先生辭不受曰辱君誼良厚然於義
無所處不敢安也時際喪亂有人攜金二十鎰倉皇
置先生寓中以去先生爲緘藏之逾年後訪其人與

之故所封識猶如初友人張某嘗假舍於先生輒私
嚮之而取其直先生不問曰朋友之義固然此豈
者何較焉遊大名有史姓者以事繫於官先生察其
無辜言於太守因得解後一日史姓攜其女至願爲
先生妾先生正色曰吾以汝負深冤而力不能自達
故不惜援手以拯耳今以子女爲報將視我爲何如
人疾驅之去順治庚子舉順天鄉試力行讀書老而
不倦尤得力於陽明傳習錄及鹿忠節尋樂大旨年
七十五卒於家子鶴齡博學敦行樂育人材孫惠榮
惠華惠正俱有文名以科第至顯官

是仲明日高景逸先生云貨色兩關落腳便成禽
獸天之生物惟人也得其秀而最靈顧可甘爲禽
獸而不恤耶若先生者於貨色兩關可謂介然無
惑凝然不動矣以此爲學非有所不爲而可以有
爲者歟

張尙若先生

先生名潛字尙若磁州人生而穎悟數歲讀書卽通曉大義年十二補弟子員順治丙戌領鄉薦己丑捷南宮壬辰選翰林院庶吉士與湯潛庵先生共相砥礪爲聖賢之學性至孝聞母病卽力請終養躬親湯藥母病遂瘥後連丁內外艱哀毀骨立喪葬如禮服闋赴補適有詞林外轉之命同人錯愕先生怡然歸鍵戶讀書於身心性命之理靡不窮究蒼翠古人格言懿行訓勉子弟家居二十年不妄交遊惟與蘇門孫徵君先生往復論學無虛日嘗曰眞學問在行誼

若知而不行猶未知也又曰除忠孝倫常外別無道
學可以見先生之所得矣年五十八卒於家所著有
澹寧集十卷

魏蓮陸先生

先生名一鰲字蓮陸保定府人少舉於鄉爲忻州刺史有惠政搜訪隱逸折節下士去官之日匹馬雙僮囊無長物世路升沉得失不介於胸恬如也聞孫徵君倡道蘇門千里就正曰道在是矣再補泗州嘆曰未能成己敢言成物不就乃於夏峯築室兼山堂畔顏曰雪亭居數載與睢州湯潛庵登封耿逸庵輩同堂問辨不倦嘗自記其所聞於師與夫讀書有得之言於雪亭夢語中潛庵稱其上下古今視千秋如旦暮惟是性高曠病不耐俗徵君謂之曰聖人之教爲

愚夫愚婦所共由賢人之教乃高人志士所獨契觀
師冕一章卽是聖人萬物一體胸襟位育參贊全體
學者進此一層方完性分所固有職分所當爲蓋勉
以知性誠身之學也康熙三十一年九月以疾卒崇
祀鄉賢先生嘗於保定城中修上谷五賢祠後人遂
以先生與張石卿等配享焉所著有四書偶錄詩經
偶錄北學編及雪亭夢語雪亭詩草行於世

張武承先生

先生名烈字武承大興人康熙庚戌科進士除恩平
令戊午薦舉博學鴻詞授編修充纂修明史官每立
一傳必博考詳徵傳疑傳信勿敢附會遷贊善預纂
修典訓館事盛暑嚴寒從不一假每當朝會敝車羸
馬蹢躅風雪中弗少懈也筮仕後貧窘甚於諸生然
性好施與每有所入必畱其半爲利濟之用凡同年
已故有親老子幼婚喪未終者竭力區畫如家事年
六十四卒祀鄉賢先生生而英敏喜博聞強記晚尤
嗜小學近思錄諸書遂以閑邪衛道爲己在所著有

大學論三綱領說時中說人心道心論朱陸同異論
王霸論諸篇而意所專注尤在王學質疑一書儀封
張清恪公見之亟刊以行世蓋喜其力駁傳習錄以
尊朱也宛平黃玉圃亦每道其學術之純云

顏習齋先生

先生名元字渾然博野人父昶爲蠡縣朱翁義子遂
姓朱爲蠡人崇禎戊寅父被掠至遼東母亦他適甲
申鼎革癸巳爲庠生名朱邦良幼讀書二三過輒不
忘學神仙導引取妻不近旣而知其妄乃益折節學
禮因悟堯舜之道在六府三事周公教士以三物孔
子以四教於是著存性存學存治存人四編名其齋
曰習齋帥門弟子行孝弟存忠信日習禮習樂習射
習書數究兵農水火堂上琴箏弓矢籌管森列嘗曰
心有事焉學之要也心有事則存身有事則修家之

齊國之治皆有事也無事則道與治俱廢故正德利用厚生曰事不見諸事非德非用非生也德行藝曰物不徵諸物非德非行非藝也先生之學以事物爲歸而生平未嘗以空言立教旣歸宗欲尋親時方亂且嗣未立久之乃如關東誓不得親不反旣而果得其蹤於瀋陽歿矣尋其墓哭奠如初喪禮招魂歸主奉而歸呈學丁憂格於成例遂棄諸生終三年喪自是用世之志愈殷曰蒼生休戚聖道明晦敢以天生之身偷安自私乎遂南遊中州張醫卜肆於開封以閱人所得甚衆與上蔡張仲誠及其門人明辨實學

言近世聖道之亡多因心內惺覺口中講說紙上議論三者之間見道而身世乃不見道學堂輒稱講堂孔門爲學而講後人以講爲學千里矣先生隱居數十年且老令長及大吏數表其門或造廬而請有勸之仕者笑不答也先是自孫徵君外先生自謂父事者五人曰刁文孝曰李孝愨曰張石卿曰張公儀曰王五公而朝夕共學者曰王法乾法乾直諒友也嘗以雜霸規先生而先生則以空腐爲誠其後諸君子相繼沒法乾亦亡先生泣然曰吾無與爲善矣進修益刻厲不懈年七十卒學使陳蓮字先生檄縣崇祀

鄉賢先生生平不欺暗室與王法乾其爲日記凡言
行善否意念欺慊逐時自勘注之勇於改過以聖人
爲必可學跬步之間必遵古禮老而彌篤乃遭人倫
之變艱危貧阨以終其身一子殤以族孫爲之後門
人李埭王源編先生年譜二卷鍾錢輯言行錄二卷
關異錄二卷

尹會一曰余方十歲時猶及見先生魁岸端嚴聽
其議論娓娓傾四座自余稍知問學先生之沒已
久矣閱歷旣多益信好朱子故於先生之書弗暇
深考然跡其生平言行間刻厲深矣崛起窮鄉力

追古道而挽頽風異學俗學觝排欲盡其諸家傑
之士無待而興者與

李恕谷先生

先生名塋字剛主號恕谷蠡縣人父明性有學行高
隱不仕學者稱爲孝慈先生同時習齋顏先生倡明
禮教因命先生師事之又學琴於張而素學射於趙
思光郭金城學書於王五公彭通學數於劉見田後
又學律呂於毛河右立日譜記身心言行得失時加
改勉至老不倦與顏習齋商酌教養之具每夜分不
寐有所得則錄之謬忘編學政平書訂閱史郅視後
依周禮約入擬太平策蓋於大學明親之業嘗欲見
諸實事冉永光竇敏修太史集名賢會講都下先生

與焉因歷及古今升降民物安危學術明昧之所以
然以及太極河圖洛書經史之真偽屯田水利天文
地理兵農禮樂之措置諸公悚聽相顧謂曰乾坤賴
此柱礎也先生言語循循終日危坐肅敬而安和近
之者不覺自斂抑北平王崑繩恢奇自命目空並世
人年將六十見先生而大悅因與共事習齋先生由
康熙庚午舉人選通州學正旋以疾告歸從遊者日
眾遠方郵書請正絡繹不絕先生雖接引甚殷未嘗
稍有矜色嘗云學者務身心修整祛妄戒昏天君湛
如而又學爲有用之學則聖道不遠矣李安溪王太

詹相國皆擬特薦於

朝先生力辭年七十五卒於家所著小學稽業大學
然業學規纂易經論語學庸傳註學禮錄學樂錄擬
太平策恕谷後集評乙古文版行於世詩春秋孟子
傳註學射御書數錄及瘳忘編等書藏於家

尹會一曰先生傳習齋之學其本在於忍嗜欲苦
筋力以勤家而養親而以其餘習六藝講世務以
備天下國家之用以是爲孔子之學而自別於程
朱晚受執友忠告遂取師說及所著諸編中之訾
贅朱子者更定過半其勇於從善尤可以爲學者

法也望溪先生云

王或庵先生

先生名源字崑繩號或庵直隸宛平人大父父明時世襲錦衣衛指揮明亡流轉江淮寓高郵先生少從其父喜任俠言兵長從寧都魏叔子學古文性豪邁所心慕獨漢諸葛忠武明王文成於文章自謂左邱明太史公韓退之外無肯北面者年四十以家貧父老始遊京師舉康熙癸酉順天鄉試然嘗自謂非其意篤於內行執兄之喪旬歲中貌若非人平生孝友可知也晚年師事博野顏習齋學禮終日正衣冠對僕隸無疾言遽色五十後葬其親迺縱遊名勝輒淹

留時復他往逾六十客山陽省身錄一編未嘗去側
卒之夕神色夷然屬其子兆符收拾遺文不及家事
尹會一日余嘗讀先生所爲文跌宕淋漓不懈而
及於古遨遊公卿間好奇節竊意先生故文章意
氣自喜之士比見望溪先生傳四君子皆稱行修
而學殖先生首列焉然後知先生不獨雄於文也
所著有易傳十卷平書二卷兵論二卷惜余未及
見之

馮周溪先生

先生名濂字周溪寧晉人故明大司寇英之元孫也少時寡言笑而內多慧聞人性皆善語輒欣然若有得祖端祺異之遂命名濂而字曰周溪蓋以周元公之無所因承而繼絕學者期之也弱冠補弟子員旋食廩餼四試畿闈不售以恩貢補學正安貧自好不汲汲於仕進其讀書一遵朱子之法以居敬窮理爲務日用飲食動靜語默整肅不苟教人必由小學始不紛綸講說有未慊此而問彼者先生曰此猶未得何遽多求嘗以中庸尊德性道問學章句數語書置

座右終日晤對於周易則專取本義謂諸家總不如
朱子之潔淨精微實得四聖心傳日讀一卦十句一
周往復無間至老如一日遊京師名公卿皆嚮慕就
見未嘗投刺先謁也所至以發蒙育德爲己任量材
設科蔚然有成高相國東軒從先生幾二十年嘗迎
至江蘇織造署中朝夕觀摩請業如少時樂道忘勢
人尤傳爲盛事年七十有四衣冠端坐而逝

尹會一曰東軒先生嘗爲余言馮先生之篤信程
朱實足維正學於勿替昔人稱曹月川爲鐵板道
學夫非其流亞歟近先生之居僅踰百里而親炙

無從則余之孤陋向學已晚也蓋雖十餘年間不
勝後先相望之感云

北學編卷之四

樂城戈濤芥舟續輯

大清二

申孚孟先生

先生名涵光字孚孟世稱鳧盟處士廣平永年人申
端愍公長子也端愍以太僕寺丞殉甲申之難先生
扶柩歸葬日夜環塚涕泣闔柏鄉魏相國文毅公爲
給諫上褒錄幽忠疏端愍與焉格於部議遂徒跣至
京號燕市中聞者感動給諫周公體觀及張公王治
相繼上疏禮部執議如故魏相再疏爭之乃予祀典

於是先生之孝彰聞遐邇有司應

詔以孝舉先生固辭之順治十四年年三十九謁孫徵君於夏峰執弟子禮得聞天人性命之蘊造詣由是日寔作性習圖義利說及荆園小語進語自淑以淑其兩弟孫徵君爲之序稱其閱歷深而動忍熟蓋篤論也仲弟涵煜季弟涵盼皆能自立先生貢成均以病辭不赴試卒年五十有九

尹嘉銓曰先生故以詩名卽余向亦以詩人目之嗣於黃奉常家得其藏書攷諸年譜然後知先生親炙夏峰潛心理學不復措意於辭章其見道也

深矣亟取魏敏果公所作墓誌以補遺庶幾信而有徵乎

王仲穎先生

先生名之銳號退菴仲穎其字也世多知其字故以字傳先生幼志聖賢之學年十四讀書至吾十有五章瞿然曰先師成童已志大學吾去成童一年耳曾小學之未通乎于是苦心焦思深自淬礪以中庸齊明盛服語書揭臥次夜必整衣端坐或竟夜不寢康熙丁丑學使安溪李文貞公按河間以課講受知召與語大歎賞曰南方無此學質也選貢使從遊攜之直撫幕下每公退輒與講說古先微言精義七年盡聞文貞性命河洛算數音韻之學文貞入相招至京

師郎第與景州魏大司空廷珍交河王少宗伯蘭生
偕一日語三公曰盍從我往迎

駕熱河乎于時

內廷新立東書房集文學才技之士先生知將薦已
不欲以捷途仕辭文貞心重之不復強已而魏王入
內廷癸巳魏捷鼎甲辛丑王賜第皆入翰林先生恬
然安之當是時文貞以道德文章網羅才俊登高而
呼天下聰明才辨之士雲集響應上者雄奇駿偉敦
琢鴻業以經世垂久次猶雍容詞苑鼓吹休明其餘
翹首跂足攀援而取仕宦者紛綸不可勝數先生澹

然冲默其間獨與江陰楊文定名時壹以切劇身心
研究經義爲務文貞嘗語人曰從吾遊者不翅數千
人然而潛心學問不求聞達南楊北王二人而已其
爲文貞推重如此館于恂邸王雅敬禮之一日小疾
王遣醫來醫著方必首葠葠出王府先生曰吾疾果
非葠弗瘳乎醫曰此故事耳葠出可勿用也先生笑
命去之以纂修周易折衷敘廣東陽春令至數月不
能枯槁獲上改教職歸雍正六年里淳儀先生家飯
因就依所親河南確山令適有

旨召詣京師將有負豫督不知所緣遠之屬鑑送刑

部至則固無罪也一訊罷遣除萬全教諭嘉隆四年
趙泰安相國疏薦其學行擢國子助教居國學十二
年自大司成以下遇之皆有加禮年近八旬日與諸
生講授不倦己巳冬詔舉經學之士梅總憲毅成何
少司空國宗並以疏舉壬申

上詢國子耆學祭酒以三人上先生與焉

召見病不能行其二人者皆超擢司業而先生竟以
明年謝病卒于家年七十有九先生之學主于躬行
實踐孝弟之氣滿容充體祭必敬喪必哀忌日不樂
終其身有兄暴于行動遇以非道先生怡然順受事

之如巖君或以過先生先生曰世兄弟多貌相承吾
兄遇我巖弟我也吾何憾事之益謹及官太學兄書
至必再拜然後發兄病就訣京師先生躬藥餌衣不
解帶月餘卒哀慟欲去官遂服以例不可止居恒莊
肅如對賓客擬而言議而動口不道人過有德于人
終身不使知之自奉極薄廩祿所入節縮以奉其兄
及親戚之乏者未嘗蓄一錢其德行醇備自鄉之耆
宿及太學士大夫稱道如出一口方望溪先生嘗言
仲穎孝友本天性學問法程朱其自命處真有矯矯
不羣壁立萬仞狀而廉靜之操當世殆無其匹云

戈濤曰先生既沒之十年余里居始得撫其生平概略爲之傳於戲先生純粹篤實好學君子也其居家真孝弟立身真有本末讀書真有見地古所謂獨立之士行不媿影寢不媿衾孔子所謂善人孟子所謂善信先生真足當之惜平生無大表見歿無有傳其學者然而風期落落古與徒矣初先生與余祖友善予自孩時卽聞余祖道其行義及見之京師每侍坐氣不屏自肅嘗過其學齋老屋空曠四壁颯颯有風時方冬了無爐火獨據一案經籍鱗次滿前凝然若不知寒者先生涵養堅定

然每自視歆然嘗言被逮時內省無咎乃猶食不能下以爲學問之氣未充其言不欺志類如此諸經皆通貫尤邃于詩易自言自康熙丙戌迄雍正庚戌玩詩至千週余嘗見其手註易冊又聞四子書及詩皆有論述今索其家都不可得矣惜哉

尹健餘先生

先生名會一字元孚別號健餘保定博野人幼孤事
節母李太夫人以孝聞登雍正甲辰進士授吏部考
功司主事遷員外郎丙午典試粵西丁未分校禮闈
胥得人出守襄陽攝荊州荆石首縣饑衆萬餘洵洵
以浮言相煽動先生單騎宣慰之賑撫其衆而收其
簧鼓倡首者衆立解移守揚州尋擢兩淮運使晉總
鹽政加僉都御史揚俗汰侈先生躬節儉屏絕餽遺
俗爲少革乾隆二年入覲巡撫廣東以母老辭

上閱其情爲改河南北宋以來理學之傳河南爲盛

明道伊川康節同源派衍歷金元明代不乏人而
國朝湯文正潛菴張清恪孝先耿嵩陽逸菴尤爲後
起卓卓先生慨然以振興絕業爲任增訂洛學編以
詔學者立五社簡好修良士爲之長月朔望長吏集
諸生講論德義因以察鄉之孝弟任卹與罷表不率
者而勸懲之逾年教大行仿周官溝樹畜牧比伍保
受之法以勸農靖民紆徐布之政成而民無擾開歸
水上章自劾因採宋富鄭公趙清獻救災事宜損益
之條爲十六次第請行皆報可是年不知有災內遷
御史中丞甫數月以母病乞終養得允歸築健餘堂

以奉太夫人先生自早歲受書及通籍歷仕至開府
未嘗一日去太夫人膝下其承顏養志雖年五十依
依猶嬰赤其居官行政每夕必告太夫人有不合或
爲輟食則長跪不敢起以故先生之孝與太夫人之
賢聲聞士大夫上達

天子御製詩章扁聯卽其家賜之當世以爲榮先生
既家居侍養之餘益博稽古人微言奧義息慮以求
其精有所得著之讀書劄記立其學社招生徒相與
講明義理之學學者翕然從之置義田以睦宗族設
義倉義學概惠其鄉里嘗曰爲學務在力行徒尙空

言無益也太夫人卒哀毀壹衷諸禮服闋之歲

上預虛少司空待之既卽任

命督江蘇學政先生以江蘇文勝實鮮敦厲小學之
教舉蘇人范文正公爲秀才法其晉接諸生溫溫然
復舊典答其拜也方望溪屏居清涼山下先生舍驢
從手操几杖造其廬請以師事聞陽湖是鏡隱居有
孝行親詣舜山訪之遂以薦于朝其敬德樂道虛已
善下類如此晉少宰仍留學政尋卒于官年五十有
八遺疏以任賢納諫爲言言不及私

上聞悼惜賜一品論祭于是鄉人請祀于鄉所歷治

地皆以名宦請祀而蘇人兼祀之道南祠以配前賢
先生之學淵懿純粹不爲岸異于古今人學術純駁
審慎別擇之而未嘗顯言攻斥曰吾惡從來學者好
爲謾罵也自居鄉泚官外建節內長耳目咸卓然有
可稱道而自視歆然若毫無所得諸己而設施于世
者望溪先生以是亟稱之所著有文集十卷詩草三
卷奏議十卷劄記語錄讀書筆記凡十七卷講習錄
二卷從宜錄一卷尹氏家譜八卷賢母年譜一卷撫
豫條教四卷尺牘四卷君臣士女四鑑錄凡十六卷
增訂洛學編五卷北學編三卷呂語集粹四卷重訂

小學纂註六卷近思錄集解十卷並行于世

戈濤曰戊午己未間予居河南親見先生之爲政也師古而宜于民先生家去予家百里孝義蒸蒸播于士林景行者衆恨不得負笈一從之遊及來京師與先生嗣子交盡讀先生書浸淫饜飫穆乎嚮往之矣

黃崑圃先生

先生諱叔琳字崑圃大興人始生具夙慧成童卽通四書五經從學饒仲如研窮性理之奧又從吳述菴究經世學年二十以康熙辛未探花及第列館職益自淬礪與衛旣齊討論宋人語錄恂恂然有醇儒風見者不覺其爲少年鼎甲也嗣歷講讀晉卿試司文衡秉節鉞落職復起屏藩山左詹事春宮公餘常手壹編以至耄耋不廢當督學山東時毅然以興賢育才爲己任捐修三賢祠於泰山之麓奉宋胡安定孫明復石徂徠歆薦如舊俾學者知所景從又興復白

雪松林兩書院延師儒選才篤捐備膏火遺士多窮
經敷用之英翕然稱盛其巡撫浙江也翦除巨惡辯
釋冤獄災傷則恤之貪墨則黜之尤以薦賢爲重所
汲引者如萊州守嚴有禧長清令劉輝祖皆以循良
遷秩而分校禮闈主試江南所拔取者理學有如任
宗丞啟運經學有如陳司業祖范文學有如徐孝廉
文靖入祀賢良者則徐撫軍士林潘敏惠思桀也張
太史淳夏太史用修李觀察慎修輩皆端方博洽與
先生教學相長其餘名士宿儒建樹接踵未可悉數
先生善識天下才俊方望溪爲諸生時來謁壹見稱

莫逆交凡望溪所著周禮春秋之學皆與先生往復指畫無少間他如周大璋顧進又數十人或不憚千里或不問歲時親炙就正則其學之及人遠矣生平著述有硯北易鈔闡發河洛之精蘊詩經統說折衷羣說之異同夏小正傳注史通訓故補注文心雕龍輯注顏氏家訓節鈔硯北雜錄則于經濟學術各有指歸纂言粹美著語精純有功儒林豈小補哉計先生自五歲就塾享壽八十有五蓋二萬九千日中無日不學也可謂純篤君子矣

尹嘉銓曰有是哉先生之虛懷善受至老不衰也

甲戌秋先生行年八十有三授余史通訓故補注
余讀至疑古惑經二篇請於先生欲取昌黎削荀
揚不合聖經之義酌爲節削毋致貽誤來學先生
怡然從之且作後序以志過於戲過亦何傷善補
爲貴昔衛武公耄而好學日誦抑戒以自警終成
睿聖之名先生有同揆矣

黃玉圃先生

先生名叔璫字玉圃崑圃先生之季弟也崑圃先生德性寬大先生則嚴厲自持其學以立誠爲本要其功于篤敬晚號篤齋以自勗云初康熙己丑成進士由太常博士遷戶部雲南司主事調吏部文選司遷稽勲員外再調文選以薦擢湖廣道御史巡視東城時王公貴人以追私逋相屬甚夥皆曰務親治先生正告同列曰御史非王官何瑣瑣若是下所司理之有銜邸命至公署者昂然坐滿御史上先生詰以何時奉差視事噤不能對則立使徹坐將疏劾之其人

上皇紀 卷之八
三
悚惕謝罪久乃釋去自是無敢以私干者時久停御
史巡邊海之制

上以臺灣亂初定

特遣先生往視之至則募餘孽釋脅從反側遂安雍
正元年任滿特畱一年

命以所行事告後任先生爲列海疆十要旣還京怨
家以蜚語中之遂落職乾隆初起河南開歸道調驛
鹽糧道豫大水先生撫災民勸卹周至濬永城河口
開儀封引河築虞城堤岸皆中窾要豫人至今頌之
在豫四年以母憂歸服除補江南常鎮揚道遇疾暫

解任疾已復原官又三年致仕家居七年卒年七十有七先生平居訥訥言不出口遇大事侃然執持不少撓屈罷職時究心宋五子書及元明諸儒集深造有得晚歲所養益粹嘗語人曰道學卽正學也親正人聞正言行正事斯爲實學不然空言性命何爲乎著有近思錄集朱慎終約編旣倦錄廣字義諸書藏于家

尹嘉銓曰先公巡撫河南時每見先生必執後進禮稱爲立不易方和而不流君子人也序其廣字義曰茲編也匪惟知之且允蹈之其行已靜以廉

其待人恭以恕其立政簡以清於戲可以見先生
之生平矣

孫文正先生

先生名承宗字稚繩一字凱陽高陽人貌奇偉長身鐵面鬚髯如戟與人言聲殷牆壁以諸生授經邊郡往來飛狐拒馬間直走白登又從紇干清波故道南下喜從老兵究問險要曉暢邊事萬曆三十二年登進士第二人授編修益究經濟之學以天下爲己任歷遷左春坊司經局洗馬熹宗卽位擢左庶子曰講官進詹事少詹事加禮部右侍郎侍講如故是時

大清兵已破遼陽廷臣交薦先生未幾邊事愈急

遂加先生太子太保賜蟒玉以閣臣督師先生力
闢羣言建議守甯遠大修邊防立六館招天下豪
傑自守山海關練精卒於甯遠分奇兵於覺華彌
串廣鹿諸島厚犒毛支龍俾遠結朝鮮撤鎮江檄
登帥沈有容據廣鹿凡戰守之具自關漸移前屯
自前屯漸移甯遠招集流亡軍威大振於是烽煙
頓息中外解嚴而廷臣忌之司農厭供億之煩本
兵張節制之勢及先生西巡薊昌閱喜峰諸口取
道京師會十月十四日爲帝生辰因請入賀當是
時魏忠賢盜國柄以先生功高欲親附之屢遣其

黨申意先生不與交一言又屢請勿遣中官視師
忠賢大憾會忠賢逐楊漣趙南星等先生聞而嘆
曰抗疏帝未必親覽憶昔進講上輒爲心開倘老
臣得因奏對極論奸邪諸狀萬一覺悟死無恨矣
至是魏廣微語忠賢曰樞輔擁兵數萬清君側兵
部侍郎李邦華內應公等齏粉矣忠賢憐甚繞御
牀哭帝亦心動顧秉謙擬旨以離信地非祖宗法
賁之先生疏言薊門昌平一帶皆臣應巡之地忠
賢亦偵知先生僅攜鹿善繼及僕從數人旋稍釋
而其黨猶連劾之其後臺諫數十人希忠賢旨請

勒先生回關防秋先生曰此詔岳飛班超抗章
求去帝許之先生在鎮四年復大城九堡四十五
練精兵十一萬立車營十二水營五火營二前鋒
後勁八沙唬船六百進四百里招集遼人四十餘
萬莊烈帝卽位王在晉入爲兵部尙書極劾馬世
龍恐先生復用力阻之及

大清兵入大安破遵化將薄都城始詔先生出初
守都城繼守通州袁崇煥被逮祖大壽驚而東奔
舉朝震駭先生馳書諭使歸命大壽唯唯密奏遼
將多世龍舊部臣已遣之前往可無慮遂督關營

昌薊兵及天下入援之師可三十萬戰守七閱月
復建昌三屯馬蘭松棚大安繼復永平灤州遷安
遵化及冷口瓦坡龍井潘關諸堡四十有奇大壽
戰功居多皆先生力也四年正月出關東巡抵松
山錦州還入關復西巡徧閱三協十二路而返條
上邊政八事時輔臣非其人朝政大壞先生知事
不可爲屢疏求去十一月得請賜銀幣乘傳歸十
一年十一月

大清兵破高陽先生于城樓北向再拜曰臣力竭
矣以一死報國時年七十有六率子孫十九人投

纓殉節惟長子高苑縣知縣銓銓子錦衣衛指揮
僉事之勞以守官不及於難甲申春從僉事宋獻
請賜諡文正

同治丁卯旣祔祀北學諸賢於蓮池書院復因
北學編原板散失重付剞劂讀之益深嚮往獨
於高陽孫相圖尙未之及不無遺憾先生爲孫
徵君鹿忠節諸公領袖亟宜補入因取明史列
傳及徵君所撰墓誌銘胡統虞所撰墓表節錄
之作先生小傳已巳孟秋大興後學李嘉端謹

識

北學編重刊校閱姓氏

魏煜

實齋

蔚州

孫葆元

蓮塘

鹽山

步際桐

香南

棗強

劉仲珩

耘藍

滄州

陳鶴年

露坪

南宮

張鏐

振之

南皮

劉源濬

曉川

永清

王發桂

笑山

清苑

陳椿年

秋坪

南宮

王仲倫

簠軒

易州

田惠中

孚齋

安州

傅慶祥

考齋

新城

重刻北學編跋

北學編一書魏蓮陸先生所輯也嗣經尹元孚戈芥舟兩先生先後續輯迄今百餘年板久無存吾鄉鮮知有是書者新城孔君慶鈺攜其家藏舊本入都商欲重刻諸同人咸憇憇之遂付剞劂是舉也不惟先正典型賴以不墜而讀書者亦當激發於立身制行一以先正爲法也

道光二十四年歲次甲辰暮春下浣東陽後學陳柱謹識

後序

先君子續輯北學編越五載而卒又三載崇祀鄉賢
其後江蘇河南皆請以名宦祀於是戈侍御曰少宰
公之論定矣吾郡王仲穎先生故醇儒也宜同續入
北學爰出傳稿見示嘉也謹奉教因思廣平申處士
詩變至道當以補遺北平二黃公久爲士林所景仰
并編列焉其有潛德未彰續有聞也敢不薰沐書之
乾隆二十九年歲次甲申春王正月博陵後學尹嘉
銓謹識

補刊校閱姓氏

桑春榮

百齋

宛平

王發桂

笑山

清苑

王仲倫

篋軒

易州

王振銖

仙五

易州

王灝

文泉

定州

李光璧

星垣

寶坻

劉曉山

西岩

河間

王履恒

健庵

清苑

歸繼先

壽彭

清苑

賀錫福

愷軒

清苑

張清元

肇一

清苑

周洛

幼川

清苑

孫承洛

冠卿

清苑

程兆祥

芝庭

清苑

李嘉端

鐵梅

大典

張楷枝

鯨橋

滿城

鹿欣理

蘇髯

定興

尹煥章

樸園

博野